



# SIUMUT INATSISARTUNI ILAASORTAATITAT / LANDSTINGSGRUPPEN

6. juuni 2007

Inatsisartut suleriaasianni § 36, imm. 1 naapertorlugu Naalackersuisunut apeqqut imaattoq matumuuna saqqummiuppara:

**Naalackersuisunut apeqqutigerusuppara aalisartut maannamut qipoqqaat peqqutigalugit bundgarniminnik aserortigiffigineqarsimasut qanoq atsigisumik taarsiiffigineqarsimanersut aammalu qanoq siunissami pilersaaruteqarfigineqarnersut qipoqqaat amerliartuinnartillugit ajornartorsiut milliartunngilluinnarmat?**

(Inatsisartuni ilaasortaq Ruth Heilmann, Siumut)

## **Tunngavilersuut:**

Nalunngilarput qipoqqaat piniutinik taamatut aserorterisarnerat qangali takornartaanngitsoq ullumikkullu qipoqqaat suli eqqissisimatitaapput, naak amerlasoorujussuannngoreeraluartut aalisarniarnermullu inuutissarsiutit pingaarnersaannut akornutaaleraluttuinnarlutik ajoraluartumik.

Sinerissami pingaartumillu Maniitsumi bundgarnersorluni saarullinniartut assut arferit qipoqqaat akornutigivaat. Bundgarninut aserorterinerat annertuvoq aammalu maani piniarnermut aalisarnermullu nakkutilliisup oqaloqatiginerani paasivara maannamut minnerpaamik arfinillit bundgarnit annertuumik aserorneqartut nalunaarutigineqarsimasut Qullersaqarfimmut ingerlateqqinneqarsimallutik.

Bundgarnit ullumikkut pisiarineri akisoqisut oqaatigineqarpoq 48.000 kr. –nit angullugit akeqartartut. Taamaalillutik aalisartut tassuunakkut annaasaat annertusaqisut tusinderpassuusarlutik aserorsimasut suliarineri pisariusaqisut piffissamik aamma annertuumik tiguisaramik annaasaqaataasarpur aalisarnissaraluamik taamalu isertitassaraluannik aningaasanik atorfissaqarteqisaminnik aammalu taamatut piniutiminnik annaasaqaraangamik pisassaraluatik taamaalillutik annaasaramikkik. Bundgarnersornermi periarfissaq sivisuneq ajormat, qaammatimmi ikittuinnaat saarulliit takkussi-maarfigisarmassuk.